



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

***Komunikadu Imprensa***  
***Tribunál Distritál Dili***  
***30 Outubru 2014***

**Tribunál suspende pena prizaun ba kazu tentativa abuzu seksuál ba menór**

Iha 23 Outobru 2014, akordaun husi Tribunál Distritál Dili kondena pena prizaun tinan 3 suspende ba tinan 4, ba arguidu DB husi Distritu Dili, ba krime tentativa abuzu seksuál ba menór.

Tribunál prova katak iha 9 Feveireiru 2014, lorokraik arguidu lori lezada ba vizita avo ida moras. Fila husi vizita ne'e to'o iha dalan klaran, arguidu kaer lezada nia kabas halo monu lezada ba rai no tenta tu'ur iha lezada nia leten ho intensaun atu halo violasaun seksuál. Lezada esforsu hodi tebe iha arguidu nia hirus matan nune'e arguidu monu ba rai, lezada aproveita halai ba informa iha nia inan-aman. Tribunál mós prova katak momentu akontese, lezada nia idade seidak to'o tinan 12.

Tribunál prova katak lezada viziñu ka hela besik malu ho arguidu, bain-bain ajuda fa'an arguidu nia ai-maran. Arguidu mós dala ruma ajuda fo osan sentavus 0.20 to'o 0.50 ba lezada tanba ajuda faan arguidu nia ai-maran.

“JSMP observa katak suspensaun ba pena prizaun ne'ebé tribunál aplika ba arguidu laiha efeitu ba prevensaun. JSMP hanoin katak arguidu nia hahalok no intensaun viola lezada ne'ebé sei ho idade menoridade hela, tuir loloos tenke kondena arguidu ba prizaun ka pena suspende ho devér ruma atu garante efeitu prevensaun hodi arguidu la bele komete krime seluk, nomos atu prevene ema seluk komete krime hanesan iha futuru”, dehan Diretór Ezekutivu JSMP, Luis de Oliveira Sampaio.

Ministériu Públiku akuza arguidu kontra artigu 177 Kódigu Penál kona-ba krime abuzu seksuál ba menór konjuga ho artigu 22, 23 no 24 Kódigu Penál kona-ba aktu preparatoriu, tentativa no tentativa nia punibilidade.

JSMP fiar katak laiha impedimentu husi lezada, hahalok arguidu ne'e bele hamosu konsekuénsia grave ba lezada nia kondisaun fisika ho psikolojika liu-liu tanba lezada ne'e minoridade. JSMP hanoin katak konsiderasaun tribunál ba intensaun ho vontade arguidu nian atu realiza faktus ne'e mak nesessariu atu aplika pena prizaun ka pena ho devér adisionál hodi prevene arguidu ne'e atu repete aktus krime seluk no prevene ema seluk tenta komete aktus hanesan ne'e.

Tribunál deklara katak arguidu provadu komete krime tanba iha autór judisiáriu sira nia oin arguidu konfesa faktus husi akuzasaun, arepende ba nia hahalok no deklara katak sei la halo tan iha futuru,tribunál konsidera nu'udar sirkunstánsia atenuante.

Bazeia ba faktus provadu no sirkunstánsia atenuante ne`ebé haleu krime ne`e, tribunál konklui hodi kondena arguidu ho pena prizaun tinan 3 suspende ba tinan 4 no kondena mós arguidu selu kustas judisial US\$20.

Kazu ne`e rejista iha tribunál ho Nú. Prosesu 606/14.TDD, Juis ne`ebé prejide akordaun reprezenta juis koleтиву Dr. José Maria de Araújo, Ministériu Públiku reprezenta husi Dra. Lidia Soares no arguidu hetan akompañamentu husi Dr. Sergio Paulo Dias Quitas husi Defensória Públiku.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPTl